

寒疫合編

劉興國

寒疫合編歌括卷三

小序

咸豐戊午春濟蒼子傅冬陽者
以選刻瘟疫摘要一書乞余爲
序余更編例瘟疫歌訣三十條
與之以資學人記誦然嘗病其

略而未詳欲攷之靈素證以群
言分條立法合傷寒六經證治
爲書或有契於又可吳公醒世
之心也歟方藉力管城而兵戈
擾攘井里邱墟不獲其志旋携
家入山刀耕自活至

今上御極之元年烽煙少息而瘟疫
盛行以吳公之法拯之無不立
起時值盛夏泉石幽然無俗塵
縈擾睡餘把卷前志復萌遂移
席松陰編輯寒疫合編歌括凡
七萬餘言越五月而稿脫然巖

居之士無從出正高明識者諒
之時同治元年長夏大暑前一
日半憇山人王光甸春田序



寒疫合編歌括目錄

卷三

小序

病源論

瘟疫初起論

初病證治歌

傳解不常論

傳解歌

急證急攻論及治證歌

表裏分傳論及歌

邪犯陽明歌

內壅不汗論及治論歌

傷寒時疫辨及辨註

發斑汗下註及歌

因證數攻論

注意逐邪勿拘燥糞論

註論汗下及承氣三法

下證歌

黃龍湯證論

瘟疫不可妄投藥餌說

似表似裏論

標本論

行邪伏邪論

四損不可正治歌

變論歌

統論瘟疫九傳治法論

寒疫合編歌括卷三

什邡王光甸春田編輯

病源論

經曰冬傷於寒春必病溫至夏爲熱病熱病者皆傷寒之類也

張仲景曰發熱不惡寒而渴者溫病也暑病則尤甚矣
陳素中辨證曰溫熱病鬱熱在裏其熱自內而達外故
不惡寒而作渴此之內熱爲重外感爲輕兼有無外
感而內之鬱熱自發者又發在春夏若誤用辛溫解

表是爲抱薪投火輕者必重重者必死惟宜辛涼開導內熱內熱除表熱自解矣亦有先見表證而後見裏證者蓋怫鬱自內達外熱鬱腠理之間若不用辛涼解散則熱邪不得外泄遂還裏而成可攻之證非如傷寒從表而傳裏也故證之輕者小柴胡湯去人參半夏加黃連天花粉枳實葛根之類證之重者三黃石膏湯加青黛葛根之類結燥者加酒蒸大黃河間雙解散尤爲對證之劑若觸冒四時不正之氣及暴感風寒以人參敗毒散九味羌活湯加減治之自

可取效

喻嘉言尙論篇曰溫熱病亦有先見表證而後裏者蓋溫熱自內達外熱鬱腠理不得外洩遂復還裏而成可攻之證非如傷寒從表而始也傷寒從表而始故誤攻而生變者多溫證未必從表始故攻之亦不爲大變然鬱熱必從外泄爲易解誤攻而引邪深入終非法也

醫宗金鑑曰一時不正之氣長幼皆病互相傳染名曰瘟疫凡治此病須識歲氣太過不及六淫勝復人之

強弱藏之寒熱量其輕重或汗或下輕以劉完素之

雙解散重以李杲之二聖救苦丸隨證施治可也

二聖救苦丸

生大黃一觔豬牙皂四兩火炮去皮弦共爲細末水丸每服三錢無根水下弱者減服

雙解散

即防風通聖散也無裏熱去硝黃疫病多自汗當去麻黃爲是

吳又可曰病疫之由皆以爲非其時有其氣春應溫而反大寒夏應熱而反大涼秋應涼而反大熱冬應寒而反大溫得非時之氣長幼之病相似以爲疫余論則不然夫寒熱溫涼乃四時之常因風雨陰晴稍爲

損益假令秋熱必多晴、春寒因多雨、較之亦天地之
常事、未必多疫也、傷寒與中暑感天地之常氣、疫者
感天地之厲氣、在歲有多寡、在方隅有厚薄、在四時
有盛衰、此氣之來、無老少強弱觸之者、卽病邪自口
鼻而入、所容納不在臟腑、不在經絡、舍於伏脊之內、
穴名去表不遠、附近於胃、乃表裏之分界、是爲半表
半裏、卽經所謂橫連膜原是也、胃爲十二經之海、十
二經皆都會於胃、故胃氣能敷布十二經中而榮養
百骸毫髮之間、靡所不貫、凡邪在經爲表、在胃爲裏、

今邪在膜原者、正當經胃交關之所、故爲半表半裏、其熱淫之氣浮越某經、卽能顯某經之病、如浮越於太陽、則有頭疼、項痛、腰脊如折、如浮越於陽明、則有目脹、目熱、眉稜骨疼、鼻乾不眠、如浮越於少陽、則有脇痛、耳聾、口苦、寒熱往來、大概觀之、邪越太陽居多、陽明次之、少陽又其次也、邪之所著、有天受、有傳染、所感雖殊、其病則一、凡人口鼻之氣通乎天氣、本氣充滿、邪不易入、本氣適逢虧欠、呼吸之氣亦自不及、外邪因而乘之、昔有三人、冒霧早行、空腹者死、飲酒

者病飽食者不病疫邪所著又何異耶若其年氣來厲不論強弱觸之卽病則又不拘於此矣其感之深者中而卽發感之淺者邪不勝正未能頓發或遇饑飽勞碌憂思氣怒正氣被傷邪氣張益營衛運行之機乃爲之阻吾身之陽氣因而屈曲故爲病熱其始也格陽於內不及於表故先凜凜惡寒甚則四肢厥逆陽氣漸積鬱氣而通故厥回而中外皆熱至是但熱而不惡寒者因其陽氣之適也此際或有汗或無汗者在乎邪結之輕重也卽使有汗乃肌表之汗若

外感在經之邪一汗而解今邪在半表半裏表雖有汗徒損真氣邪氣深伏何能得解必俟其伏邪已潰表氣潛行于內乃作大戰積氣自內由膜原以達表振戰止而後熱此時表裏相通故大汗淋漓衣被濕透邪從汗解此名戰汗當卽脉靜身涼霍然而愈然有自汗而解者但出表爲順卽不藥亦自愈也伏邪未潰所有之汗止得衛氣蹇逆熱雖蹇減逾時復熱午後潮熱者至是鬱甚陽氣與時消息也自後加熱而不惡寒者陽氣之積也其惡寒或微或甚因其人

之陽氣盛衰也。其發熱或短或長或晝或夜或純熱
黎明稍減。因其感邪之輕重也。疫邪與瘧彷彿。但瘧
不傳胃。惟疫乃傳胃。始則皆先凜凜惡寒。旣而發熱。
又非若傷寒發熱而兼惡寒也。至於伏邪已潰。方有
變證。其變或從外解。或從內陷。從外解者。順從內陷
者。逆更有表裏先後不同。有先表而後裏者。有先裏
而後表者。有表裏偏勝者。有表裏分傳者。有表而再
表者。有裏而再裏者。從外解者。或發斑或戰汗。狂汗
盜汗。從內陷者。胸膈痞悶。心下脹滿。腹中痛。便燥結。